

徂徠石先生文集

卷十二之十六

但錄石先生文集

卷之四

新雕徂徠石先生文集卷第十二

書

上范中丞書

上郭殿院書

上趙先生書

上杜副樞書

上張兵部書

上范中丞書

五月九日鄆州觀察推官將仕郎試祕書省校書郎石
介聞新除中執法乘疾□趣歸闕且過於鄆走短僕夫
持書數幅見張旄大旆至則以書跪於馬前而宣其書
中言曰今天子命河陽舊相李公入平章中書事命青

州牧天章閣待制范公爲御史中丞四海之望洽矣三
靈之心協矣人主聰明一朝獨運於萬機之上沛然發
乎宸憲旣已於四月十七日天子憲法行革近朝敝政
七條事又於二十一日罷八御藥官思掃除頽風一新
庶政乾坤上下日月寰海莫不清潤乃躬引忠鯁亮直
恢闔博達之士一立於巖廊以口天下之政令一領於
中司以持天下之紀綱夫巖廊之上政令所出政令一
不善則天下無政令矣中司之任紀綱所在紀綱一不
正則天下無紀綱矣內外官府百餘局唯中書憲臺爲
天子腹心耳目爲朝廷總領爲天下都會國家官人千

數員宰相中丞執天子憲法行天子誥命布天子教化
故天子特重其任周禮有大宰小宰大宰則今之宰相
也小宰則今之中丞也所以黃扉青瑣坐而論道絳服
白簡會常專席蓋以嚴其地也尊其人也示百寮不得
而並也衆人不得而爲也惟主上英智神武睿畧雄斷
能任人不疑外取賢傑以自輔相惟相國耆德宿望忠
誠正氣能耐久不變終升口輔惟中丞大節直道危言
敢諫能守正不撓自結明主簡在帝心符於物望人神
上下胥相協慶窮天之垠合億萬口并億萬心如一心
如一口無人異辭者初成命出土走諸朝吏走諸府商

走諸市農夫走諸野皓白之老三尺之童鼓舞歡欣騰躍道路曰天地久不序陰陽久不和風雨久不時寒暑久不節其待吾天子吾相國吾中丞而調乎淫靡蠹人文佛老害政教興作奪農時土木耗民財其待吾天子吾相國吾中丞而救乎刺史多輕授縣令多非人良直多泥埋奸賊多旌擢其待吾天子吾相國吾中丞而闢乎中貴人黨盛千餘年口含天憲手握王爵出入內外權傾四海天子之命不出於軒墀之上而出於房闈天下之政不出於廊廟之間而在於閹寺其待吾天子吾相國吾中丞而禁乎歲旱久不雨螟蟲久爲災天下民

阻飢而且將死其待吾天子吾相國吾中丞而食乎鰥
寡惇獨不能自養者怯懦困窮不能自存者聞之曰我
其爲吾天子吾相國吾中丞所生乎窮海之隅荒山之
徼覆盆之下日月有不照臨者聞之曰我其爲吾天子
吾相國吾中丞所提乎天子之明之聖擬於堯舜侔於
禹湯過於文武相國中丞之功之德格於皇天被於四
海暨於草木蟲魚故能感於人心懷於民情壯偉哉以
相國中丞同德協心左右我聖天子天下太平可延頸
翹首而待也唐太宗得房魏明皇得姚宋故李唐十八
世三百年獨貞觀開元爲太平以我聖天子亦唐太宗

明皇也以相國中丞亦太宗之房魏明皇之姚宋也豈
知明道不爲貞觀開元乎閣下無曰吾位爲中丞致太
平宰相之事閣下雖則中丞天子之任閣下也以宰相
天下之待閣下以其中丞行宰相之事乎況主上注意
天下屬心踐登公槐正位巖廊在旦暮矣惟相國中丞
爲天子爲天下致太平焉且夫聖人乘運運乘氣天地
間有正氣有邪氣聖人生乘天地正氣則爲真運運氣
正天地萬物無不正者矣故其君爲明君臣爲賢臣民
爲良民百物無札瘥天傷陰陽順序風雨時降昆蟲草
木各遂其生植不有變恠蓋至正之氣行於天地間東

西南北中央上下無容髮隙妖孽惑邪之氣無自入矣
有毛髮之隙容邪氣干之正不純一矣故運氣正必有
聖人乘之而王聖人必有賢人起焉而輔黃帝之六相
唐堯之舜禹有虞之十六相湯之伊尹仲虺高宗之傅
說文王之太公閎天成王之周公召公漢祖之蕭曹光
武之耿鄧唐太宗之房魏明皇之姚宋憲宗之裴度皆
應期運而生也易曰同聲相應同氣相求水流溼火就
燥雲從龍風從虎聖人作而萬物覩言各從其類今天
子乘正氣而王今相國今中丞逢真運而生聖賢符會
千載旦暮在此時也惟相國不以十三四年處顛危困

蹟變其前節惟中丞不以三四年間取華塗顯仕塞其
素量直以得真主逢真運如舜禹十六相佐唐虞伊尹
傳說之佐湯高宗太公閎天周公召公之佐文武成王
房魏姚宋裴度之佐太宗明皇章武俾我聖天子六五
帝而四三皇太平之基丕丕與高天厚地而比崇永三
靈之心四海之望也文中子曰君子之於帝制并心一
氣而待也傾耳而聽拭目而視太康之始書同文車同
軌君子曰帝制可作矣而不克振太熙之後而君子息
心焉今區域混一文軫遐暨聖天子春秋鼎盛盛德日
新天下傾耳拭目以待堯舜之治斯亦常制可作之

時也相國中丞當竭王佐之才罄忠臣之節以副人主
急太平之意符天下傾耳拭目之望無如太康之際帝
制遂不克振使天下君子息心耳介生二十九年在貧
賤寒餒中胷臆鬱鬱不得舒散一旦見聖人龍行雷動
於六合之上賢臣躍起雲會耳目如豁聾瞽心意祛積
滯踴躍奮悚不能制其喜以筆盡寫胷中事布之於旌
麾下擯焉納焉惟命不宣介頓首

上郭殿院書

百拜獻書於殿院執事天聖末天后出閨闈坐軒墀上
手握天下柄恩威刑賞自己出宰相百官重足屏息不

敢動充員備位而已恩厚宗屬祿賞過差惟器與名假
於廝役非勲非德濁亂品流宰相不能復持其綱紀輒
以太祖太宗真宗三世之成憲弛之憲臺四御
史舉其職曰天下綱紀旣不在宰相堂則當在吾府宰
相旣弛之吾屬又不能持之賞罰其誰明名器其誰正
天下其誰屬朝廷其誰倚我太祖太宗真宗之
垂法遂隳矣乃削牘公車請於上前言直意切觸龍逆
鱗宮中赫然震怒迫責逐出以暴露其過天下想望四
御史風采頌歎四御史聲烈而歌舞之曰以直道進復
以直道退得所進退矣今年四月一日皇帝始親決萬

機革故鼎新萬物皆動乾行雷動六合聲聞旣已革近
朝弊政七條事又罷八御藥官思與天下潔濯洗然清
明端正治本建隆皇極以河陽舊相李公先朝元老四
海具瞻乃召歸中書執政事筆以青州牧天章閣范公
忠亮骨鯁本朝名臣乃引入御史府爲中丞以河北轉
運使李公剛簡直烈周行正人乃延登御史府知雜以
陳州通判范仲淹敢言極諫縉紳端士乃擢在諫署爲
諍臣又還四御史以起廢滯以旌良直太平之政赫然
以新三王之風延頸可待天下復想望四御史風采歎
頌四御史聲烈而歌舞之曰以直道退復以直道進得

所進矣惟四御史天資忠直魁閎偉傑之氣應時運而生當天后朝能烈烈持綱紀爲國家盡死節擯斥千里外頓挫摧辱幾至死而曾不避信忠誠亮節貫白日矣今人主聰明神聖英威睿武增諫員廣言路黜儉人用壯士任人不疑聽納如流諫者不懼言者無罪傳曰邦有道則危言危行御史今得其時也朝廷復有遺有闕待他人補之乎補之不盡其責他人乎盡在於御史矣夫百鍊不耗良金也千里不跌良驥也夷險不改其操窮達不易其行真賢人也詩曰靡不有初鮮克有終唐元相微之初拜左拾遺卽日獻教本書數月間上封事

六七授監察御史劾奏東師違詔條過籍稅又奏卒塗
山甫等八十八家冤事東諸侯不奉法東御史府不治
事命分臺董之時有河南尉局從軍職尹不能止監軍
使死其柩乘傳入郵郵吏不敢詰內園擅械繫人踰年
臺府不知飛龍使匿起氏亡命奴爲養子主不敢言浙
右帥封杖杖安吉令至死子不敢訴稹或奏或劾或移
皆舉正之聲名揭然聳動內外風望凜凜天下延想旣
爲權臣所擠黜江陵徙通判移越州凡八九州年復歸
朝忠骨輔爲佞氣正色揉爲諛容乃變節從權附離以
媒身事雖得進用姑齷齪自保卒不能復建嘉謀立奇

節以裨國家君子鄙之史臣譏之萬世之下爲後人賤其得幾何其失幾何御史其初旣能蹈元之躅其終無復躡元之迹君子曰不欺闇室又曰十手所指十目所視今天下傾耳拭目以觀御史之舉朝廷之上一言出一善布天下聞之天下見之一言失一善廢天下伺之天下窺之其欺豈特闇室也其指其視豈特十手十目也惟御史能有其初能有其終社稷幸甚四海幸甚不宣介頓首

上趙先生書

謹上書先生左右介近得姚鉉文粹及昌黎集觀其述

作有三代制度兩漢遺風殊不類今之文曰詩賦者曰
碑頌者曰銘贊者或序記或書箴必本於教化仁義根
於禮樂刑政而後爲之辭大者驅引帝皇王之道施於
國家教於人民以佐神靈以浸蟲魚次者正百度敘百
官和陰陽平四時以舒暢元化緝安四方今之爲文其
主者不過句讀妍巧對偶的當而已極美者不過事實
繁多聲律調諧而已彫鏤篆刻傷其本浮華緣飾喪其
真於教化仁義禮樂刑政則缺然無髣髴者易曰文明
以止觀乎人文化成天下春秋傳曰經緯天地曰文堯
則曰欽明文思禹則曰文命敷於四海周則曰郁郁乎